

Mussar colur

Per l'interpellant Martin Candinas giascha la balla uss tar il chantun e la Lia

DAD ANDREAS CADONAU

■ **Positiv valitescha il cusseglier guvernativ Martin Jäger la risposta dal cussegl federal sin l'interpellaziun da Martin Candinas pertutgant l'avegnir da la pressa rumantscha. La Lia Rumantscha beneventa medemamain la tenuta exprimida dal cussegl federal. Il chantun e la Lia ha il cussegl federal defini sco acturs principals entaifer la tschertga da soluziuns durablas per las medias rumantschas.**

Per il cusseglier guvernativ *Martin Jäger*, il chau dal Departament chantunal d'educaziun, cultura e protezciun da l'ambient èsi impurtant che la confederaziun sa participeschia a la tschertga da soluziuns per l'avegnir da las medias rumantschas. Il pled scrit saja en in concept futur part integrala da la purschida media-la rumantscha. Il cusseglier guvernativ ha menziunà in emprim contact tranter la represchentanza da l'Uffizi federal da cultutra, il chantun Grischun e la Lia Rumantscha a Cuira nua che soluziuns futuras sajan vegnidas discutadas. Jäger ha menziunà l'intervenziun dal deputà *Aurelio Casanova* en il cussegl grond che sa drezza en la medema direzziun sco l'interpellaziun da *Martin Candinas* en il cussegl naziunal.

La regenza grischuna vegnia a formular sia risposta sin la sessiun da l'october dal cussegl grond. Independentamain da la risposta da la regenza saja gia ussa cler ch'i dettia sulet ina soluziun coordinada per in concept durabel. E gist or da quella perspectiva saja la risposta dal



Il cussegl federal vesa la valor da las medias rumantschas per la promoziun da la lingua, quai punctuescha el en la risposta sin l'interpellaziun da Martin Candinas.

KEYSTONE

cussegl federal da valitar sco ordvart positiva.

In cler signal

Il cusseglier naziunal Martin Candinas valitescha la risposta dal cussegl federal sin sia interpellaziun sco cler signal vers il chantun Grischun e la Lia Rumantscha,

da tschertgar e definir las soluziuns futuras per la pressa rumantscha. Sche gist il partenari il pli lunsch davent, la confederaziun, punctueschia l'impurtanza da las medias rumantschas per la promoziun ed il mantegniment da la cultura e lingua rumantscha stoppian ils acturs impurtants, il chantun e la Lia Rumantscha,

mussar colur. Satisfatg è il cusseglier naziunal grischun da l'opziun finanziaria definida en la risposta dal cussegl federal sin sia interpellaziun. Là ha il cussegl federal menziunà il messadi da cultura da la confederaziun per ils onns 2016 enfin 2020 e la prontadad dad augmentar ils meds finansials a favur da la promoziun

rumantscha. Principalmain per ils Rumantschs ordaifer ils lieus da tschep da la Rumantschia. Entaifer la cunvegna da prestaziun cun il chantun Grischun per ils onns 2017 enfin 2020 saja la confederaziun pronta dad augmentar la summa per 450 000 francs. Uschenavant che las medias gioghian ina rolla en quel context existia in tschert spazi per chattar soluziuns.

Sco impurtant valitescha Candinas il fatg che la Rumantschia demussia unitad anovers en quella situaziun e na tschenta betg en dumonda cuntinuadamain la purschida existenta. Ch'il cussegl federal saja pront da metter a disposiziun dapli daners conferma il fatg che la politica da linguas da la confederaziun na saja betg sulet in paragraf mort.

Elavurar soluziuns

La Lia Rumantscha beneventa da sia vart medemamain las explicaziuns dal cussegl federal, sco l'organisaziun tetgala da la Rumantschia scriva en ina communicaziun. La risposta conferma l'intent da la Lia Rumantscha da sviluppar in concept che cuntegna perspectivas per las medias stampadas ed electronicas sco per las prestaziuns da la Agentura da novitads rumantscha. Sco part integrala dal project vegnia garantì che La Quotidiana cumparia fin ch'il concept saja elavurà e madir per la realisaziun, scriva la Lia Rumantscha. Ella vul elavurar quel concept las emnas proximas da cuminanza cun la confederaziun, il chantun sco era cun l'editura da la Quotidiana, la Somedia Pressa SA.